



**UNIVERZITET U SARAJEVU
REKTORAT**

**PRAVILNIK
O NAGRAĐIVANJU AKADEMSKOG I
NAUČNOISTRAŽIVAČKOG OSOBLJA UNIVERZITETA U
SARAJEVU NA OSNOVU REZULTATA NAUČNOG /
UMJETNIČKOG RADA**

-Prečišćeni tekst -

Sarajevo, april 2022. godine

Na osnovu člana 130. Zakona o visokom obrazovanju („Službene novine Kantona Sarajevo“, broj: 33/17, 35/20, 40/20 i 39/21) i člana 59. Statuta Univerziteta u Sarajevu, a u vezi sa Strategijom razvoja naučnoistraživačkog/umjetničkoistraživačkog rada na Univerzitetu u Sarajevu, Prijedlogom Savjeta za nauku i umjetnost Univerziteta u Sarajevu broj: 0105-4144/22 od 12. 04. 2022. godine i Odlukom Senata Univerziteta u Sarajevu broj: 01-6-91/22 od 27. 04. 2022. godine, Senat Univerziteta u Sarajevu je na 46. redovnoj sjednici održanoj 27. 04. 2022. godine, donio *Prečišćeni tekst*

**PRAVILNIKA
O NAGRAĐIVANJU AKADEMSKOG I NAUČNOISTRAŽIVAČKOG OSOBLJA
UNIVERZITETA U SARAJEVU NA OSNOVU REZULTATA
NAUČNOG / UMJETNIČKOG RADA**

Član 1.

(Svrha i cilj pravilnika)

- (1) Svrha Pravilnika je nagrađivanje akademskog i naučnoistraživačkog osoblja za izvrsna istraživanja i objavljivanje kvalitetnih publikacija. Cilj Pravilnika je napredovanje UNSA i Bosne i Hercegovine na svjetskim rang listama univerziteta i država prema njihovom doprinosu nauci.
- (2) Pravilnikom se predviđa posebno nagrađivanje umjetničkog rada i nagrađivanje rada u oblasti disciplina od posebnog nacionalnog značaja.

Član 2.

(Kriteriji za nagrađivanje)

- (1) Naučni rad se vrednuje radovima objavljenim u časopisima koje registruje baza podataka Web of Science Core Collection (WoSCC). Uzimaju se u obzir samo radovi sa UNSA u afilijaciji (Univ Sarajevo; razlikovati od Int Univ Sarajevo i Burch Univ Sarajevo), koji su duži od dvije stranice i koji su u WoSCC-u kategorisani kao članci (Document Type: Articles) ili kao pregledni radovi (Document Type: Review). Izuzetno, kraće radove i radove kategorisane u neki drugi tip dokumenta može odobriti Savjet za nauku i umjetnost UNSA. Pored toga, Savjet za nauku i umjetnost UNSA, uz eventualne konsultacije sa Odborom za bibliotečko-informacioni sistem UNSA, može odobriti vrednovanje naučnih monografija/ knjiga, odnosno poglavlja u njima, pod uslovom da su objavljene u prestižnim svjetskim izdavačkim kućama.
- (2) Naučni radovi se razvrstavaju po kvartilima (Q1, Q2, Q3 i Q4 prema faktoru uticaja časopisa (JIF kvartili) u Journal Citation Reports (JCR)). Ako časopis u kojem je objavljen rad iz oblasti humanističkih nauka i umjetnosti (Arts & Humanities Citation Index) nije svrstan u određenu kvartilu prema JCR, tada se kvartila određuje prema SCImago Journal Rank (SJR) iz Elsevierove citatne baze podataka Scopus. Time se postiže ravnopravna zastupljenost svih naučnih oblasti i grupacija UNSA. Listu radova i kandidata iz oblasti nauke sa izvodom iz baze podataka WoSCC Savjetu za nauku i umjetnost UNSA dostavljaju službe UNSA/Rektorata.
- (3) Umjetnički rad se vrednuje na osnovu analize koju Savjetu za nauku i umjetnost UNSA dostavlja Grupacija umjetnosti. Analiza treba da sadrži listu kandidata sa obrazloženjem.

- (4) Rad u oblasti disciplina od posebnog nacionalnog interesa, u skladu sa članom 5. ovoga Pravilnika, vrednuje se na osnovu analize koju Savjetu za nauku i umjetnost UNSA dostavlja Grupacija humanističkih nauka. Analiza treba da sadrži listu kandidata sa obrazloženjem.
- (5) Nagrađuju se kandidati koji su u radnom odnosu na UNSA/organizacionoj jedinici UNSA, kao i kandidati koji su istovremeno u radnom odnosu sa UNSA/organizacionom jedinicom i nastavnom bazom te organizacione jedinice.

Član 3.

(Nagrada za naučni rad)

- (1) Kandidati skupljaju bodove na osnovu objavljenih naučnih radova koji su razvrstani po kvartilima i to: Q1 – 10 bodova, Q2 – 7 bodova, Q3 – 4 boda i Q4 – 2 boda. Ukoliko je objavljeni rad svrstan u više kvartila, kao referentni se uzima bolje rangirani kvartil. Radovi u ESCI indeksu, vrednuju se sa 1 bodom. Broj bodova za dati rad se dijeli sa brojem koautora toga rada. Za prve, zadnje i korespondirajuće autore minimalni broj bodova je 25% od broja bodova za dati kvartil. Ako je rad svrstan u kvartil Q1 minimalni broj bodova je 2, osim za rad svrstan prema WoSCC-u u grupu autora (Group Author(s)) za koji je minimalni broj bodova 1. Broj bodova za naučnu monografiju/knjigu objavljenu u prestižnoj svjetskoj izdavačkoj kući određuje Savjet za nauku i umjetnost UNSA, uz eventualne konsultacije sa Odborom za bibliotečko-informacioni sistem UNSA. Maksimalni broj bodova za objavljenu monografiju/knjigu je 15 bodova, a za objavljeno poglavlje u monografiji/knjizi maksimalni broj bodova je 5. Broj bodova za dati rad se dijeli sa brojem autora tog rada.
- (2) Kandidati koji imaju 3 boda ili više od 3 boda se nagrađuju na osnovu broja bodova.
- (3) Kandidatima koji imaju manje od 3 boda bodovi se prenose u narednu godinu.

Član 3a.

(Nagrada za izuzetna postignuća žena u nauci)

- (1) Dodjeljuje se jedna nagrada najbolje plasiranoj ženi na listi kandidata za nagrađivanje za naučni/umjetnički doprinos.
- (2) Nagrada se simbolično dodjeljuje na Međunarodni dan žena i djevojaka u nauci koji se obilježava 11. februara.

Član 4.

(Nagrada za umjetnički rad)

- (1) Dodjeljuje se jedna nagrada za umjetnički doprinos u prethodnoj godini.
- (2) Dodjeljuje se jedna nagrada za višegodišnji doprinos umjetnosti.

Član 5.

(Nagrada za rad u disciplinama od posebnog nacionalnog značaja)

- (1) Dodjeljuje se jedna nagrada za poseban doprinos u oblasti nacionalnih humanističkih disciplina (jezik, književnost, istorija, muzikologija, etnomuzikologija, etnologija, arheologija i dr.) za prethodnu godinu.

- (2) Dodjeljuje se jedna nagrada za poseban doprinos u oblasti nacionalnih humanističkih disciplina (jezik, književnost, istorija, muzikologija, etnomuzikologija, etnologija, arheologija i dr.) za višegodišnji doprinos.

Član 6.

(Utvrdjivanje liste kandidata i nagrada)

- (1) U oktobru svake godine Savjet za nauku i umjetnost UNSA utvrđuje listu kandidata za nagrađivanje za naučni/umjetnički doprinos u prethodnoj godini.
- (2) Lista kandidata za nagrađivanje naučnog rada sadrži i broj bodova određen u skladu sa članom 3.
- (3) Službe UNSA/Rektorata utvrđuju novčani iznos nagrada za datu godinu u skladu sa raspoloživim finansijskim sredstvima.
- (4) Nagrađenima se dodjeljuje i priznaje u pisanom obliku, čiji sadržaj utvrđuje Senat Univerziteta u Sarajevu na prijedlog Savjeta za nauku i umjetnost.

Član 7.

(Završne odredbe)

- (1) Finansijska sredstva za nagrađivanje/dodjeljivanje sredstava prema ovom Pravilniku obezbjeđivat će se iz sredstava Fona za razvoj UNSA i iz drugih raspoloživih sredstava.
- (2) Efekti primjene ovoga Pravilnika će se kontinuirano analizirati i Pravilnik će se po potrebi modificirati i dopunjavati.

Član 8.

(Stupanje na snagu)

Prečišćeni tekst Pravilnika stupa na snagu danom donošenja i bit će objavljen na web stranici Univerziteta u Sarajevu.

REKTOR

Prof. dr. Rifat Škrijelj



Broj: 01-6-91-1/22

Sarajevo, 27. 04. 2022. godine